

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- केंद्री मंत्रिमंडल नै दिल्ली ते अंबाला बश्कार दऊं नमियां रेल लाइनां जोड़ने गी मंजूरी दिती जेहदे नै जम्मू लेई रेल संपर्क च सुधार होग।
- मुखमंत्रि उमर अब्दुल्ला होरें हाल च होए दे भारत-अमरीका बपार समझौते दे जम्मू-कश्मीर दे करसानें पर पौने आहले असर पर चैंता बुज्झी। केंद्री राईबाई मंत्री होरें भरोसा दोआया जे करसानें दे हितें कन्नै कोई बी समझौता नेई कीता जाहग।
- सुरक्षा चिंताएं दे चलदे कठुआ जिले दे सरहदी इलाकें च औने-जाने पर पाबंदियां लाइयां गेइयां।
- महाशिवरात्रि दा पवित्तर ध्यार समूलचे जम्मू-कश्मीर च धार्मिक उत्साह कन्नै मनाया जा'रदा ऐ। उपराज्यपाल मनोज सिन्हा होरें शिवरात्रि दी मुबारकबाद दिती।
- आई.सी.सी टी-20 क्रिकेट कप 2026 च अज्ज भारत दा मुकाबला रिवायती हरीफ पाकिस्तान कन्नै होग।

<><><><><><>

Railway-Jammu

जम्मू च रेल राबता हुन बेहतर होआ'रदा ऐ। केंद्र नै दिल्ली ते अंबाला बश्कार 2 बादू नमिएं रेल लाइनें गी मंजूरी दिती ऐ। केंद्र दे फैसले दी घोशणा करदे होई केंद्री रेलवे मंत्री अश्विनी वैशणव होरें आखेआ जे एहदे कन्नै दिल्ली-जम्मू कारीडोर च राबता बदोग। एहदे कन्नै यात्रिएं गी होर मती सहूलत होग। एहदे कन्नै श्री माता वैशणो देवी कटड़ा, श्रीनगर, जम्मू, शिमला ते होरनें उत्तर भारत दी सैलानी थाहें पर राबते गी मजबूती थहोग। नमीं दिल्ली च मीडिया कन्नै गल्लबात करदे होई रेल मंत्री अश्विनी वैशणव होरें आखेआ

तोआई, जम्मू रेलवे डिविजन नै श्री माता वैश्वो देवी कटड़ा ते नर्मि दिल्ली ते वाराणसी बश्कार फरवरी ते मार्च लेई विशेष आरक्षित रेल गड्डियां चलाने दी घोषणा कीती ऐ। विशेष रेल नंबर 04081, 04082 नर्मि दिल्ली ते कटड़ा बश्कार 21 फरवरी थमां 8 मार्च तगर चलोग जिसले कि रेल गड्डी नंबर 04603, 04604 वाराणसी ते कटड़ा बश्कार 22 फरवरी, 26 फरवरी, 2 मार्च ते 6 मार्च गी चलोग।

<><><><><><>

India US Trade Deal

मुख्यमंत्री उमर अब्दुल्ला हों हल च घोषित कीते गेदे भारत-अमरीका बपार समझौते पर चिंता जाहर कीती ऐ। उनें आखेआ जे इस समझौते कन्ने जम्मू-कश्मीर दे मुकामी करसाने पर असर पेई सकदा ऐ कीजे इस समझौते दे तैहत जम्मू-कश्मीर दे बदाम, अखरोट, सेअऊ ते होर दुए ताजे फल ते सुक्के मेवे जनेह उत्पादे गी शुल्क मुक्त करी दिता गेआ ऐ। मुख्यमंत्री हों जोर देइयै आखेआ जे करसाने अपनी पैदावार च सुधार आहने च कई बरे लाए दे न ते नमें बपार सरबन्धी शर्ता मुकामी राई-बाई सैक्टर आस्तै चुनौतियां पैदा करी सकदियां न। श्रीनगर च मीडिया कन्ने गल्ल करदे होई मुख्यमंत्री हों आखेआ

तोआई, केंद्री राईबाई ते करसान कल्याण मंत्री शिवराज सिंह चौहान हों भरोसा दोआया जे सरकार दी प्राथमिकता राश्ट्री जरूरतें गी संतुलित करदे होई करसाने दे कल्याण दी राक्खी करना ऐ। उनें आखेआ जे करसाने दे हितें कन्ने कोई बी समझौता नेई कीता जाहग।

<><><><><><>

Kathua IB Restriction

कठुआ दे प्रशासन आसेआ अंतरराश्ट्री बन्ने दी 5 किलोमीटर दी हद दे अंदर-अंदर आवा जाई पर पाबंदियां लाइयां न। जिला मैजिस्ट्रेट राजेश शर्मा हों आखेआ जे एह तरीकाकार बन्ने पारा थमां गोलीबारी ते राश्ट्र बरोधी गतिविधिं दी रोकथाम ते ग्रामीणों दी सुरक्षा गी ध्यानै च रखदे होई अपनाए गए न।

साम्बा-कठुआ आहली परानी शिड़क पर राती 9 बजे थमां बड्डलै 6 बजे तगर भारी गड्डिएं दी आवाजाई पर पाबंदी होग। एह पाबंदियां 14 फरवरी थमां लागू होइयां न ते अगले 60 दिनें तगर अमल च रौहडन। नियमें दी खलाफवर्जी करने आहलें खलाफ सख्त कार्रवाई कीती जाहग।

<><><><><><>

Satish BRO Chief Meet

बन्ने आहले इलाके च शिड़क राबता बेहतर करने दे मकसद कन्नै ट्रांसपोर्ट मंत्री सतीश शर्मा होरें सीमा शिड़क संगठन दे प्रमुख आर.के मिश्रा हुंदे कन्नै महत्वै आहली हल्के च ढांचागत विकास सरबंधी मामलें पर चर्चा कीती। बैठक च समेंसिर निर्माण, शिड़क दा दर्जा बदाने पर चर्चा होई। एहदे अलावा बेहतर सेहत सरबंधी दिक्खभाल, शिक्षा, आपात सेवा ते जरूरी चीजें-बस्तें दी सप्लाई पर बी गल्ल होई। बन्ने आहले इलाकें दे रणनीतिक महत्व गी उजागर करदे होई शर्मा होरें आधुनिक इंजीनियरिंग तौर-तरीके अपनाने ते म्यार बनाई रखने पर जोर पाया। बीआरओ नै फास्ट ट्रेकिंग दे आधार पर मदद ते बन्ने आहले इलाकें दे लोकें दा जीवन बेहतर बनाने दा भरोसा दोआया।

<><><><><><>

Mahashivratri

महा शिवरात्रि दा ध्यार समूलचे जम्मू-कश्मीर च पूरी धार्मिक श्रद्धा ते उत्साह कन्नै मनाया जा'रदा ऐ। अज्जै दे दिन लोक वर्त रखदे न, खास पूजा-अर्चना करदे न ते रात भर मंदरें च बी प्रार्थना करदे न। बडले सवेला थमां गै मते सारे श्रद्धालु मंदर च मत्था टेकने ते शिवें दा आशीर्वाद लैने लेई जा'रदे न। आकाशवाणी समाचार कन्नै गल्ल करदे होई किश श्रद्धालुएं आखेआ

उपराज्यपाल मनोज सिन्हा, मुखमंत्री उमर अब्दुल्ला ते होरनें दुए नेताएं लोकें गी पवित्तर शिवरात्रि दे मौके पर शुभकामनां दितियां न।

<><><><><><>

Dy CM Inspections

उपमुख्यमंत्री सुरिंद्र चौधरी हों सतवारी, अखनूर ते सुंदरबनी च सरकारी दफतरें दा चानचक्क निरीक्षण कीता तां जे प्रशासनिक कम्मकाज ते सार्वजनिक सेवाएं दी अमलावरी दा जायजा लैता जाई सकै। अखनूर च एस.डी.एम दफतर ते पी.डब्ल्यू.डी (आर एण्ड बी) डिविजन ते सब डिविजन दफत्रें दे अपने दौरे दरान उपमुख्यमंत्री हों पूरे कम्मकाज दा जायजा लैता ते मैहकमे दी कारकदगी बारे जानकारी हासल कीती। मगरा सुंदरबनी दे पी.डब्ल्यू.डी गेस्ट हाउस च उनें कई प्रतिनिधिमंडलें ते मुकामी लोकें कन्नै मलाटी कीती। लोकें उनेंगी बक्ख-बक्ख मुद्दे ते विकास सरबन्धी कम्में दी प्रगति बारे जानकारी दिती। चानचक्क निरीक्षण दरान उपमुख्यमंत्री हों ड्यूटी शैड्यूल दा सख्ती कन्नै पालन करने ते सरकारी कम्में गी समेंसिर सबूरा करने पर जोर दिता। इस मौके पर मीडिया कन्नै गल्ल करदे होई चौधरी हों आखेआ

<><><><><><>

India Pak Match

आई.सी.सी टी-20 विश्व कप च अज्ज दा दिन बड़ा गै खास होने आहलाए कीजे अज्ज भारत ते पाकिस्तान बश्कार मैच खेड्ढेआ जाना ऐं एह मैच भारती समें मताबक शामी लै 7 बजे श्रीलंका दे कोलम्बो शैहर च खेड्ढेआ जाहग। इक-दुए दे रिवायती हरीफ भारत ते पाकिस्तान प्रतियोगिता च अजे धोड़ी दो-दो मुकाबले जितियै 4-4 अंक हासल करी चुके दे न। तोआई, अज्ज 2 होर मैच बी खेड्ढे जाडन। पैहला बड्डलै 11 बजे वेस्ट इंडीज ते नेपाल बश्कार मुम्बई दे वानखेडे स्टेडियम च ते दुआ त्रै बजे अमरीका ते नामीबिया बश्कार चेन्नई च खेड्ढेआ जाहग।

<><><><><><>

Snow Marathon

डोडा जिला प्रशासन राश्ट्री राइफल्स ते भद्रवाह विकास प्राधिकरण कन्नै रलियै कल 16 फरवरी गी स्नो मैराथॉन Runfor Martyrs दा सरिस्ता करा'रदा ऐ।

5 किलोमीटर दी एह द्रौड़ चिंता इलाके थमां जय घाटी तगर होग जेहदा मकसद शहीदें दा सम्मान करने दे कन्नोकन्नी लोकें अंदर देशभक्ति दी भावना पैदा करना बी ऐ। इस द्रौड़ दा विशेषार ऐ Feel the snow feel the pride.

<><><><><><>

Weather

मौसम विभाग नै औंदी 17 फरवरी गी जम्मू-कश्मीर दे उप्परले इलाके च हल्की बर्फबारी दी पेशनगोई कीती ऐ। उआं एहदे अलावा 25 फरवरी तगर पूरे केंद्र शासित प्रदेश च मौसम आमतौरा पर खुशक रौहने दी तवक्को दस्सी गेदी ऐ। मकामी लोकें ते सफर करने आहलें गी सौहगा कीता गेदा ऐ जे ओह मौसम बारै जारी जानकारी ते पेशगोई गी ध्यानै च रखदे होई गै सफर पर निकलन। मौसम विभाग दे डरैक्टर मुख्तयार अहमद हौरें इस बारै जानकारी दिंदे होई दस्सेआ

<><><><><><>